

## **U 2025.godini Državno tužilaštvo efikasnim radom riješilo više od 31 hiljade predmeta**

Državno tužilaštvo ostvarilo je tokom 2025. godine izuzetne rezultate u radu, ostvarivši visok nivo efikasnosti, organizacione sposobnosti i spremnosti da odgovori na povećan obim posla u svim oblastima svoje nadležnosti.

U 2025. godini Državno tužilaštvo je riješilo 144,44% predmeta u odnosu na broj zaprimljenih u toj godini. Riješeno je 9.634 predmeta više nego što je primljeno. Time su, osim zaprimljenih predmeta, riješeni i brojni zaostali predmeti iz ranijih godina, što je dovelo do smanjenja ukupnog broja zaostalih predmeta i značajnog unapređenja efikasnosti rada.

U izvještajnom periodu formirano je 21.680<sup>1</sup> novih predmeta, što predstavlja povećanje od 16,60% u odnosu na 2024. godinu, kada su formirana 18.592 predmeta. Trend rasta priliva predmeta prisutan je već nekoliko godina, imajući u vidu da je u 2023. godini formirano 16.084, a u 2022. godini 15.694 novih predmeta. Zajedno sa 12.977 predmeta prenijetih iz ranijih godina, Državno tužilaštvo je tokom 2025. godine postupalo u ukupno 35.575 predmeta.

Uprkos značajnom povećanju opterećenja, tokom godine riješeno je rekordnih 31.314 predmeta, što je za 77,2% više nego u 2024. godini, kada je riješeno 17.674 predmeta. U poređenju sa 2023. godinom broj riješenih predmeta veći je za 97%, dok je u odnosu na 2022. godinu ostvaren rast od 111,7%. Ovakvi rezultati potvrđuju kontinuirani trend unapređenja efikasnosti rada, pri čemu je broj riješenih predmeta u periodu od 2022. do 2025. godine rastao prosječno 27,5% godišnje.

Državno tužilaštvo riješilo je skoro cjelokupan broj predmeta koji su pristigli tokom 2025. godine (98, 31%) pokazujući visok stepen ažurnosti. Time su značajno smanjeni zaostaci i povećao se ukupan obim riješenih predmeta.

Značajan rast aktivnosti zabilježen je i kod prekršajnih postupaka. Tokom 2025.godine podnijeto je 859 zahtjeva pred prekršajnim sudovima, dok je zajedno sa predmetima prenijetih iz ranijeg perioda u radu bilo ukupno 1.072 predmeta. U odnosu na 2024. godinu to predstavlja povećanje od 215,81%, što ukazuje na značajno intenziviranje postupanja u ovoj oblasti.

Pored rada na predmetima, državni tužioci su prisustvovali na 20.055 glavnih pretresa i sjednica pred prvostepenim i drugostepenim sudovima. To svjedoči o intenzivnom profesionalnom angažmanu i kontinuiranom izvršavanju funkcije krivičnog gonjenja pred sudovima.

Ostvareni rezultati potvrđuju da je Državno tužilaštvo Crne Gore unaprijedilo efikasnost i kvalitet svog rada kroz zakonito, odgovorno i profesionalno postupanje. Rekordan broj riješenih predmeta, visok stepen ažurnosti i sposobnost da odgovori na kontinuirano rastući priliv predmeta svjedoče o stabilnosti i posvećenosti Državnog

---

<sup>1</sup> Ne uključuje predmete Vrhovnog državnog tužilaštva

tužilaštva. Navedeni rezultati predstavljaju značajan doprinos zaštiti javnog interesa, jačanju vladavine prava i unapređenju povjerenja građana u pravosudni sistem u cjelini.

